

Dumonda Bischof concernent la garanzia da las resursas finanzialas e spazialas sco er concernent l'ulteriur svilup da projects sco soluziuns da cuntinuaziun da la Chasa da dunnas dal Grischun

Actualmain han lieu ils Dis d'acziun internaziunals «16 dis cunter violenza envers dunnas», nua ch'i vegn mussà cleramain, ch'ils dretgs da las dunnas èn dretgs umans e che la violenza specifica per la schlattaina è ina violaziun dals dretgs umans. Persunas cun impediments, persunas pli veglias sco er persunas queeras èn pertutgadas anc pli fitg da violenza a chasa.

Il dumber dals femicidis ha puspè cuntanschì in maximum l'onn 2025. Quest svilup exprima las structuras patriarcalas e las tenutas misogynas enragischadas profundamain, ma er la violenza rassistica e l'ostilitad cunter persunas queeras stattan savens a l'origin da quests acts. Er la violenza a chasa che vegn registrada da la polizia, mussa ina tendenza preoccupanta: Tenor la statistica publitgada l'onn 2024 hai dà in augment da 3,2 pertschient – ed ins sto partir dal fatg, che questa tendenza cuntinueschia. La chasa da dunnas è impurtanta per las dunnas e per ils uffants pertutgads da violenza sco post da consultaziun e sco lieu da refugi. Per pudair ademplir questa incumbensa en moda fidada dovri basas finanzialas stabilas, avunda capacitads spazialas ed ina purschida furnida da persunas professiunalas. La Convenziun d'Istanbul recumonda expressivamain ina finanziaziun da basa sco er in'amplificaziun confurma als basegns da las structuras da chasas da dunnas. Ultra da quai na duess l'occupaziun media d'ina chasa da dunnas betg surpassar 75 pertschient, per ch'i saja pussaivel da tut temp da dar alloschi a curta vista a cas urgents.

La politica, la publicitad e la polizia han ina responsabladad centrala per la prevenziun ed il cumbat cunter la violenza specifica per la schlattaina, sexistica e rassistica. Per quest intent èn scolaziuns cuntinuantas e resursas suffizientas indispensablas.

Gugent supplitgesch jau perquai la Regenza da responder las suandantas dumondas:

1. È la Regenza pronta da megliar las resursas finanzialas da la Chasa da dunnas dal Grischun – en spezial cun introducir u cun auzar ina finanziaziun da basa – quai per ademplir las prescripziuns da la Convenziun d'Istanbul?
2. Quant gronda è stada l'occupaziun media da la chasa da dunnas durant ils ultims 3 onns ed èn planisads plazz supplementars u soluziuns da cuntinuaziun, sche las capacitads vegnan surpassadas?
3. Co vegn sustegnida la lavur da la polizia en il chantun per impedir in cumportament sexistic, queerofob u rassistic? Existan formats da scolaziun e da furmaziun supplementara obligatorics sco scolaziuns d'etica, da diversity u scolaziuns da prevenziun da violenza?
4. Tge mesiras planisescha la Regenza per rinforzar e per coordinar la prevenziun da violenza a chasa e da violenza specifica per la schlattaina en il chantun?

Cuira, ils 10 da december 2025

Bischof, Danuser (Cuira), Gansner, Altmann, Atanes, Bachmann, Bardill, Baselgia, Beeli, Bergamin, Biert, Binkert, Bisculm Jörg, Cahenzli-Philipp, Cola, Das, Degiacomi, Dietrich, Furger, Gartmann-Albin, Gianelli, Gredig, Hoch, Holzinger-Loretz, Horrer, Kohler, Kreiliger, Maissen, Mani, Mazzetta, Messmer-Blumer, Müller, Nicolay, Oesch, Orlik, Preisig, Rageth, Rusch Nigg, Rutishauser, Said Bucher, Saratz Cazin, Schläpfer, von Ballmoos, Zanetti (Sent), Zanetti Marion (Landquart), Zaugg-Ettlin, Zindel